


C 5

L



ADVIS
PRESENTE
A V R O Y.

Sur la recherche generale de
ses Finances , & contre
les fauteurs d'icelles.

M. DC. XXIII.

Case

F

39

32.6

1623ad


AVIS

PRESENTE

AV ROY.

THE NEWBERRY
LIBRARY
Les Finances, & compte
les fautes d'icelles.

M. DC. XXIII



ADVIS PRESENTE
*au Roy, sur la recherche generale
de ses Finances, & fauteurs
d'icelles.*



SIRE,

Comme la Monarchie Françoise ne peut subsister sans vn chef en la Iustice ; Ainsi il est certain que pour le gouuernement general des Finances de France, (qui sont les principaux nerfs de l'Estat,) il faut de necessité qu'il y ait

vn Sur-intendant , duquel
tous les Officiers de finance
dépendent , tant pour empe-
cher le cours du desordre qui
est parmy eux , que pour ren-
dre raison à vostre Majesté,
à toutes occasions , des de-
niers dont il peut faire estat
selon l'vrgence de ses affai-
res , & dissiper par pruden-
ce les grands mescontente-
mens formez dans les esprits
des Princes , de la Noblesse,
& du peuple , par la noncha-
lance & confusion de ceux
qui en ont eu la direction : les-
quels n'ayans pour but que
leur interest , ont ruiné les af-

5
fares de vostre Estat, tant dedans que dehors, & fait miserablement patir & desesperer ceux qui ont eu affaire à eux par leurs iniustes & mauuaises intelligences.

Or pour bien faire le choix d'un Sur-intendant, il faut qu'il ait plusieurs qualitez ensemble, lesquelles se rencontrent rarement en vn homme seul.

La premiere, Qu'il soit Gentil-homme de naissance, pour estre appellé par vostre Maiesté à quelques honneurs & dignitez qui le releuent: à fin d'obliger les Grands à trait-

ter plus volontiers avec luy, les petits à le respecter, & les Financiers à obeïr & craindre tout ensemble.

La seconde, Qu'il ait peu de parés à la Cour, peu ou point d'enfans, hors d'alliance & de cabale avec les Financiers: car estant de ceste condition, infailliblement il preferera la gloire de servir vostre Maïesté en ceste charge, à la consideration des Financiers, & à l'vtilité de ses affaires particulieres.

Il faut après le considerer par les qualitez de son esprit: Qu'il soit doux, prompt, la-

7

borieux , cupide d'honneur ,
& resolu. Sur tout , que ses
mœurs soient esloignées d'v-
ne extrême rapine : le reuenu
entier de vostre Maiesté ne
suffiroit pas à ceux qui sont
touchez de ce mal. Qu'il ne
soit pas aussi dans la profu-
sion : Ces deux extremittez se
doiuent fuir : Mais il le faut
desirer également liberal &
œconome, & en faire le iuge-
ment par le cours de ses affai-
res domestiques.

Il faut aussi qu'il ait accez
de long temps près de vostre
Maiesté : à fin de luy donner
plus de creance enuers la No-

blesse, & d'autorité sur les Financiers, pour se contenir en leur deuoir, & empescher absolument qu'ils ne pillent plus vostre Maiesté, la Noblesse & le peuple, comme ils ont faict.

Sur tout, qu'il soit en reputation de tenir sa parole : à fin qu'elle puisse seruir à vn besoin de credit a vostre Maiesté : & que l'esperance qu'il donnera aux Princes, a la Noblesse & autre, leur soit comme vne assurance, en laquelle ils se reposent, en attendant l'effect de ses promesses, qu'il pourra mesnager selon les
temps,

temps, & les personnes: Et par ce moyen empescher que les esprits alterez pour les iniustices & pilleries que l'on a fait au payement des assignations, pensions, appoinctemens, gages, dons, recompenses, debtes, & autres sortes d'affaires, ne se portent à vne subuersion generale, dont l'Estat a esté menacé, & à laquelle, par ce seul moyen, l'on peut remedier.

Pour ce qui est de l'efficace de la charge, vn homme tel que l'on l'a dépeinct n'en fera pas si tost pourueu, que dans le troisieme mois l'on

ne remarque visiblement vn changement aux esprits & aux affaires, & qu'il ne fasse cesser les plaintes generales que l'on a fait contre les Intendans, & les Officiers de France, lesquels par leur desordre, ont dissipé licencieusement le bien de vostre Majesté, osté à la Noblesse le moyen de seruir, & ruiné ainsi miserablement vostre Majesté, & le pauvre peuple, qui gemit & crie vengeance contre les Ministres de l'Estat.

Quant à la fonction, il n'y a pas grand secret. Elle ne consiste qu'à sçauoir l'estat de la

valeur des Finances, en menager la despence ordinaire, suiuant les vieux Estats & les extraordinaires par ses seules Ordonnances, & selon la necessité des affaires de vostre Maiesté. Prendre l'ordre de vous pour cela, faire compter par estat tous les trois mois les principaux comptables & Fermiers generaux de France, & empescher d'oresnauant que la grande quantité de deniers extraordinaires qui se leuent (dont il n'est point faict estat dans celuy de la valeur) ne se dissipent plus cy après par huiet ou dix Fi-

nanciers , qui souz pretexte d'aduances imaginaires, ont illicitement tiré plus de trente millions de liures. Depuis six ans y a eu la reuente des Greffes , Commissaires des Tailles, Regratiers, reestablisement & creation d'Esleuz , Thresoriers de France, & des Fermes , & d'autres offices créez & reestabliz , sans qu'il en soit tourné le quart au profit de vostre Majesté. Chose déplorable, que faute d'un homme qui ait eu l'œil sur eux , l'on ait permis qu'ils ayent pillé visiblement vostre Mejesté, rançonné la No-

blesse & le peuple , à la veuë de toute la rFance, sans que personne se soit mis en peine d'y apporter le remede.

Il y à trois hommes à la Cour qui peuuent seruir vostre Maiesté en la charge de Sur-intendant, & qui sont à peu pres de la condition que l'on doit desirer l'un , plus, l'autre moins : mais sur les deux, l'un particulierement, SIRE, (bien consideré par les qualitez de son esprit & de sa condition, en est le plus capable.

Ce que l'on doit obseruer est de faire cognoistre à celuy

qui fera pourueu de ceste charge, que le seul bien des affaires de vostre Maiesté & de l'Estat l'y appellent l'exhorter particulièrement à s'y conduire en homme de bien, luy donner quelques honneurs, presens avec l'esperance des bien faicts de vostre Maiesté, à l'aduenir, selon le merite de ses seruices : Cela le portera sans doute à vne bonne resolution de seruir dignement. Cependant l'on doit faire faire inuentaire de son bien, pour luy oster le moyen & l'enuie d'en posseder d'auantage, si ce n'est de la pure

liberalité de vostredite Ma-
iesté.

Ce choix est necessaire pour
le bien de vostre Estat, le con-
tentement general de tous les
ordres du Royaume, & pour
faire cesser les furieux desor-
dres qui sont dans les affaires
de vostre Maiesté. A quoy
l'on peut adiouster, qu'il ap-
portera vn extreme conten-
tement à vostre Maiesté, de
voir par le seul employ d'un
homme, prosperer ses affai-
res, le peuple soulagé, la No-
blesse satisfaiete, & les com-
ptables remis en leur deuoir.

F I N.

